



*Alþingi*  
*Erindi nr. Þ 140/2104*  
*komudagur 7.5.2012*

Aratungu, 7. maí 2012

Nefndarsvið Alþingis  
Atvinnuveganefnd Alþingis  
Austurstræti 8-10  
150 Reykjavík

**Efni: Umsögn um þingsályktun um áætlun um vernd og orkunýtingu landsvæða; 727. mál**

Vísað er til tölvubréfs frá nefndarsviði Alþingis, dags. 25. apríl 2012, þar sem óskað er eftir umsögn Bláskógabyggðar um þingsályktun um áætlun um vernd og orkunýtingu landsvæða, þingmál nr. 727.

Sveitarstjórn Bláskógabyggðar tók erindið fyrir á fundi sínum þann 3. maí 2012 og var eftirfarandi umsögn bókuð:

*Lögð fram tillaga til þingsályktunar um áætlun um vernd og orkunýtingu landsvæða. Í fyrirliggjandi tillögu er gert ráð fyrir að Hagavatnsvirkjun verði í biðflokki, en því beint til verkefnisstjórnar að taka virkjunarkostinn til nánari skoðunar og meta hvort ástæða sé til að gera tillögu um breytta flokkun hans.*

*Bláskógabyggð ítrekar fyrri bókun sína frá 27. október 2011, dagskrárliður 3.2 á 119. fundi byggðaráðs Bláskógabyggðar. Jafnframt vill sveitarstjórn undirstrika mikilvægi þess að gætt verði að áhrifum uppfoks af svæðinu með tilliti til loftgæða. Mikil svifryksmengun af uppfokssvæðum við Hagavatn skerðir mjög loftgæði innan Bláskógabyggðar og langt útfyrir sveitarfélagið s.s. á Höfuðborgarsvæðinu. Hér er ekki einungis um brýnt umhverfismál að ræða heldur einnig afar brýnt heilbrigðismál sem lýtur að lifsskilyrðum íbúa á Suðvesturlandi.*

*Sveitarstjórn Bláskógabyggðar felur sveitarstjóra að ítreka fyrri umsögn og senda jafnframt þessa bókun sveitarstjórnar til nefndarsviðs Alþingis.*

Jafnframt er fyrri umsögn sveitarstjórnar Bláskógabyggðar send hér til áréttingar á afstöðu hennar til þingsályktunarinnar:

*Til margra ára hefur það verið mikið áhugamál hjá sveitarstjórn Bláskógabyggðar og þar áður sveitarstjórn Biskupstungnahrepps að endurheimta fyrri hámarksstærð Hagavatns með stíflugerð til að hefta sandfok og endurheimta gróðurþekju á nærliggjandi svæðum. Samhliða því hefur sveitarstjórn haft hug á því að nýta þá framkvæmd og vatn Hagavatns til orkuframleiðslu með það að markmiði að auka hagkvæmni þeirrar framkvæmdar. Landgræðsla ríkisins hefur verið áhugasöm um þetta verkefni og unnið að rannsóknnum þar að lútandi. Landgræðslan ásamt fulltingi Biskupstungnahrepps lét vinna mat á umhverfisáhrifum þess að hækka vatnsborð Hagavatns með því að stífla Farið, árið 1997. Sveitarstjórn Bláskógabyggðar hefur áður ályktað um mikilvægi þess að færa yfirborð Hagavatns til fyrra horfs til að hefta sandfok og tryggja árangur uppgræðslustarfs, sem hún hefur tekið þátt í meðal annars með Landgræðslu ríkisins. Þetta verkefni hefur einnig verið mikið hagsmunamál hjá landeigendum Úthlíðartorfunnar.*



*Hið mikla jarðvegsfok frá svæðinu ætti flestum að vera alkunna, en oft á tíðum er þetta einna stærsti valdur að svifryksmengun á suðvesturhluta landsins, s.s. í Reykjavík. Því til stuðnings eru til margar loftmyndir.*

*Með tilliti til allra þeirra rannsókna sem hafa átt sér stað um umhverfisþætti svæðisins, getur sveitarstjórn Bláskógabyggðar ekki verið annað en algerlega ósammála þeim rökstuðningi sem fram kemur í tillögu um þingsályktun, það sem lýtur að Hagavatnsvirkjun. Fyrir liggja í dag hugmyndir um virkjun Hagavatns, sem hefur tekið umtalsverðum breytingum frá fyrri hugmyndum. Um er að ræða mun umhverfisvænni útfærslu. Virkjunin verði m.a. útfærð sem rennslisvirkjun sem mun tryggja mun stöðugra vatnsyfirborð ofan stíflu. Rafmagnstengingar verði að mestu leyti í jarðstrengjum. Vegslóðar og reiðleiðir verði samræmdar til að stemma stigu við utanvegaakstur m.a. við Jarlhettur. Við útfærslu virkjunarinnar gefst einnig kostur á að opna fyrir ýmsa möguleika á frekari tengingu við starfsemi ferðaþjónustu á svæðinu.*

*Byggðaráð vill leggja áherslu á, að með þessari framkvæmd er verið að endurheimta fyrra horf Hagavatns, hefta jarðvegsfok, auka möguleika á landgræðslu og bæta lífsgæði íbúa á áhrifasvæði uppfoksins.*

*Sveitarstjórn Bláskógabyggðar fer þess eindregið á leit við iðnaðarráðuneytið og frummælendur fyrirbyggjandi þingsályktunartillögu að Hagavatnsvirkjun verði færð til um flokk, þ.e. úr biðflokki í orkuvinnsluflokk.*

Hér með er umsögn og athugasemdir sveitarstjórnar Bláskógabyggðar komið á framfæri við atvinnuveganefnd Alþingis.

Virðingarfyllt,

Valtýr Valtýsson  
sveitarstjóri Bláskógabyggðar